

Nicole Hoevertsz eligi pa forma parti di e Comision di Coordinacion pa Weganan Olimpico di Tokyo 2020



ORANJESTAD (AAN)---Comite Olimpico Arubano cu orguyo ta anuncia cu Secretaria General di COA y a la vez miembro di Comite Olimpico Internacional, Sra. Nicole Hoevertsz a wordo informa pa presidente di IOC, sr. Thomas Bach cu su persona a wordo apunta pa forma parti como miembro di e Comision di Coordinacion pa e Weganan Olimpico di aña 2020, cu lo tuma lugar na e ciudad di Tokyo, Japon.

Den e structura di IOC e Comision di Coordinacion pa Weganan Olimpico ta wordo considera e comision di mas importante, mirando cu e tin cu garantis e bon celebracion di e Weganan Olimpico.

Durante shete aña largo, e Comision di Coordinacion ta cana hunto cu e Comité Organizador y ta sirbi como consehero principal pa esaki.

Nombracion di Nicole Hoevertsz den e Comision di

Coordinacion pa e Weganan di Tokyo sigur ta un honor masha grandi mes. Remarcabel ta cu ya caba sra. Hoevertsz lo forma parti di dicho comision esaki pa cu e Weganan Olimpico di Rio de Janeiro na aña 2016. E nombracion nobo aki ta nifica cu IOC ta satisfecho cu e trabao cu e ta desempeña den e Comision di Coordinacion di Rio de Janeiro y ta desea pa Nicole sigui ehecuta e tarea aki.